



**ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ
ՈՐՈՇՈՒՄԸ**

**«ԿՇԻՌՆԵՐԻ ԵՎ ՉԱՓԵՐԻ ՄԻՋԱԶԳԱՅԻՆ ԲՅՈՒՐՈՅԻՆ (ԿԶՄԲ/BIPM)» ԱՍՈՑԻԱՑԻԱԾ
ԱՆԴԱՄ ԴԱՌՆԱԼՈՒ ՄԱՍԻՆ» ԵՎ «ՕՐԵՆՍԴՐԱԿԱՆ ՉԱՓԱԳԻՏՈՒԹՅԱՆ ՄԻՋԱԶԳԱ-
ՅԻՆ ԿԱԶՄԱԿԵՐՊՈՒԹՅԱՆԸ (ՕԶՄԿ/OIML)» ԹՂԹԱԿՑԱՅԻՆ ԱՆԴԱՄ ԴԱՌՆԱԼՈՒ
ՄԱՍԻՆ» ՆԱՄԱԿ-ՀԱՄԱՁԱՅՆԱԳՐԵՐՈՒՄ ԱՄՐԱԳՐՎԱԾ ՊԱՐՏԱՎՈՐՈՒԹՅՈՒՆՆԵՐԻ՝
ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐ-
ՅԱԼ ԳՈՐԾՈՎ**

Քաղ. Երևան

23 դեկտեմբերի 2025 թ.

Սահմանադրական դատարանը՝ կազմով.

Նախագահող՝

դատավորներ՝

Արման Դիլանյանի (զեկուցող),

Արտակ Զեյնալյանի,

Հրայր Թովմասյանի,

Դավիթ Խաչատուրյանի,

Երվանդ Խունդկարյանի,

Հովակիմ Հովակիմյանի,

Էդգար Շաթիրյանի,

Սեդա Սաֆարյանի,

Արթուր Վաղարշյանի,

մասնակցությամբ (գրավոր ընթացակարգի շրջանակներում)՝

Կառավարության ներկայացուցիչ՝ Էկոնոմիկայի նախարարի տեղակալ

Նարեկ Հովակիմյանի,

համաձայն Սահմանադրության 168-րդ հոդվածի 3-րդ կետի, 169-րդ հոդվածի 3-րդ մասի, ինչպես նաև «Սահմանադրական դատարանի մասին» սահմանադրական օրենքի 23-րդ հոդվածի 1-ին մասի, 40 և 74-րդ հոդվածների,

դռնբաց նիստում գրավոր ընթացակարգով քննեց ««Կշիռների և չափերի միջազգային բյուրոյին (ԿՉՄԲ/BIPI)» ասոցացված անդամ դառնալու մասին» և «Օրենսդրական չափագիտության միջազգային կազմակերպությանը (ՕՉՄԿ/OIML)» թղթակցային անդամ դառնալու մասին» նամակ-համաձայնագրերում ամրագրված պարտավորությունների՝ Սահմանադրությանը համապատասխանության հարցը որոշելու վերաբերյալ» գործը:

Կառավարությունն իր՝ 2025 թվականի մայիսի 29-ի N 657-Ա որոշմամբ հավանություն է տվել «Կշիռների և չափերի միջազգային բյուրոյին (ԿՉՄԲ/BIPI)» ասոցացված անդամ դառնալու մասին» և «Օրենսդրական չափագիտության միջազգային կազմակերպությանը (ՕՉՄԿ/OIML)» թղթակցային անդամ դառնալու մասին» նամակ-համաձայնագրերը վավերացնելու մասին» օրենքի նախագծի վերաբերյալ Կառավարության օրենսդրական նախաձեռնությանը և որոշել է նամակ-համաձայնագրերում ամրագրված պարտավորությունների՝ Սահմանադրությանը համապատասխանությունը որոշելու նպատակով դիմել Սահմանադրական դատարան:

Գործի քննության առիթը Կառավարության՝ 2025 թվականի մայիսի 30-ին Սահմանադրական դատարան մուտքագրված դիմումն է:

Սահմանադրական դատարանի 2025 թվականի հուլիսի 1-ի ՍԴԱՌ-103 աշխատակարգային որոշմամբ սույն գործով վարույթը կասեցվել է մինչև համապատասխան մարմիններից ապացույցներ և պարզաբանումներ ստանալը: Սահմանադրական դատարանի 2025 թվականի նոյեմբերի 11-ի ՍԴԱՌ-155 աշխատակարգային որոշմամբ սույն գործի վարույթը վերսկսվել է:

Ուսումնասիրելով «Կշիռների և չափերի միջազգային բյուրոյին (ԿՉՄԲ/BIPI)» ասոցացված անդամ դառնալու մասին» և «Օրենսդրական չափագիտության միջազգային կազմակերպությանը (ՕՉՄԿ/OIML)» թղթակցային անդամ դառնալու մասին» նամակ-համաձայնագրերը (այսուհետ նաև՝ համապատասխանաբար՝ ԿՉՄԲ/BIPI և ՕՉՄԿ/OIML նամակ-համաձայնագրեր), հետազոտելով սույն գործով Կառավարության ներկայացուցչի գրավոր բացատրությունը և գործում առկա մյուս փաստաթղթերը՝ Սահմանադրական դատարանը

Պ Ա Ր Զ Ե Ց .

1. ԿԶՄԲ/BIPM նամակ-համաձայնագիրն ստորագրվել է 2025 թվականի մարտի 18-ին՝ ԿԶՄԲ/BIPM ասոցացված անդամ դառնալու նպատակով, իսկ ՕԶՄԿ/OIML նամակ-համաձայնագիրը հաստատվել է 2025 թվականի ապրիլի 2-ին՝ 2025 թվականից ՕԶՄԿ/OIML-ի թղթակցային անդամ դառնալու նպատակով:

2. ԿԶՄԲ/BIPM նամակ-համաձայնագրի համաձայն՝ Հայաստանի Հանրապետության էկոնոմիկայի նախարարությանն առընթեր «Ստանդարտացման և չափագիտության ազգային մարմին» փակ բաժնետիրական ընկերությունը պատասխանատու կլինի առնչվող բոլոր հարցերում Հայաստանի Հանրապետությանը ներկայացնելու համար:

ՕԶՄԿ/OIML նամակ-համաձայնագրի համաձայն՝ էկոնոմիկայի նախարարությունը պատասխանատու է օրենսդրական չափագիտության ոլորտում քաղաքականության մշակման համար, իսկ «Ստանդարտացման և չափագիտության ազգային մարմին» ՓԲԸ-ն իրականացնում է օրենսդրական չափագիտության ոլորտի քաղաքականությունը:

ԿԶՄԲ/BIPM նամակ-համաձայնագիրն ունի առդիր, այն է՝ 2025 թվականի մարտի 17-ին կազմված հաշիվ ապրանքագիրը՝ Հայաստանի Հանրապետության՝ 2025 թվականի ասոցացված պետության կարգավիճակով առաջին անդամավճարը:

3. Նամակ-համաձայնագրերով Հայաստանի Հանրապետությունն ստանձնում է պարտավորություն՝ վճարել տարեկան անդամավճարներ:

ԿԶՄԲ/BIPM նամակ-համաձայնագրի համաձայն՝ 2025 թվականի համար նախատեսված 13 359 (հաշիվ-ապրանքագիրը կցվում է) եվրոյի չափով առաջին տարեկան անդամավճարը ԿԶՄԲ կողմից ստացվելուց հետո՝ ասոցացված պետություն դառնալու գործընթացը կավարտվի և Հայաստանի Հանրապետությունը կդառնա ասոցացված պետություն:

Հաջորդ տարիների համար բաժանորդագրությունը ենթակա կլինի Կշիռների և չափերի գլխավոր համաժողովի ընդհանուր կոմիտեի (ԿԶԳՀ) 24-րդ նիստի (2011թ.) 4-րդ բանաձևի դրույթներին, ի լրումն ԿԶՄԲ-ի կողմից տրամադրվող դոտացիայի վերաբերյալ ԿԶԳՀ-ի հետագա որոշումների:

4. Համաձայն ԿԶԳՀ-ի 24-րդ նիստի (2011թ.) 4-րդ բանաձևի¹ դրույթների՝ ասոցացված անդամ հանդիսացող պետությունները պարտավոր են առաջին հինգ տարվա ընթացքում

¹ <https://www.bipm.org/en/committees/cg/cgpm/24-2011/resolution-4>

վճարել տարեկան անդամավճար, որի չափը հաշվարկվում է՝ ելնելով տվյալ պետության կողմից Միավորված ազգերի կազմակերպությանը վճարվող անդամավճարի չափից: Միևնույն ժամանակ, դիմումին կից ներկայացված Ֆինանսների նախարարության եզրակացության համաձայն՝ Օրենսդրական չափագիտության միջազգային կազմակերպությանը թղթակցային և Կշիռների և չափերի միջազգային բյուրոյին ասոցացված անդամակցության գործընթացի մեկնարկը նախատեսվում է 2025 թվականից, և անդամակցության առաջին տարվա անդամավճարի ամբողջական վճարումն իրականացվելու է ՄԱԿ-ի արդյունաբերական զարգացման կազմակերպության կողմից (...): Հետևաբար՝ հաշվի առնելով վերոնշյալը, 2025 թվականին՝ ասոցացված պետության կարգավիճակում, Հայաստանի Հանրապետության առաջին տարվա անդամավճարը կֆինանսավորվի ՄԱԿ-ի արդյունաբերական զարգացման կազմակերպության կողմից, իսկ հետագա տարիներին՝ սկսած 2026 թվականից, Հայաստանի Հանրապետությունը կվճարի անդամավճարներ:

5. «Օրենսդրական չափագիտության միջազգային կազմակերպության հիմնադրման մասին» կոնվենցիայի 5-րդ հոդվածի համաձայն՝ Թղթակից անդամները չեն կարող ներկայացվել Համաժողովում, սակայն կարող են նշանակել դիտորդներ, որոնք գործում են զուտ խորհրդակցական ձայնի իրավունքով: Նրանք չեն վճարում անդամակցության վճարներ, ինչպես անդամ պետությունները, սակայն կրում են իրենց պահանջով այդպիսի ծառայություններ մատուցելու ծախսերը, ինչպես նաև Կազմակերպության հրատարակությունների բաժանորդագրության ծախսերը:

ՕԶՄԿ-ին որպես Թղթակից անդամ միանալու ընթացակարգի համաձայն՝ Թղթակից անդամ դառնալու համար անհրաժեշտ է ազգային օրենսդրական չափագիտության համար պատասխանատու անձի կամ համապատասխան նախարարի կողմից ստորագրված նամակ ուղարկել Օրենսդրական չափագիտության միջազգային բյուրո, որով, ի թիվս այլնի, ապագա Թղթակից անդամը պարտավորվում է վճարել Օրենսդրական չափագիտության միջազգային համաժողովի կողմից սահմանված տարեկան միանվագ անդամակցության վճարը:

Օրենսդրական չափագիտության տասնվեցերորդ միջազգային համաժողովի արձանագրության նախագծի 10.1. կետի համաձայն՝ Թղթակից անդամի ընթացիկ վճարը կազմում է 1 400 եվրո (այսինքն՝ 1-ին դասի անդամ պետության ներդրվող միջոցների բազային

մասնաբաժնի 10%-ը)՝ անկախ Թղթակից անդամի բնակչության թվից կամ դրա տնտեսության բարգավաճման աստիճանից: Թղթակից անդամի տարեկան ներդրվող միջոցների չափը կավելանա 2024 թվականից սկսած և աստիճանաբար կաճի՝ նպատակ ունենալով մինչև 2028 թվականն այն հավասարեցնել անդամ պետության՝ վերջինիս դասի համար սահմանված տարեկան ներդրվող միջոցների 50%-ին (ենթակա է հաստատման 17-րդ համաժողովի ընթացքում): Թղթակից անդամի ներդրվող միջոցների բազային մասնաբաժնի առաջարկված ավելացումը տեղի կունենա հետևյալ եղանակով.

- 2022թ.՝ 1 420 եվրո,
- 2023թ.՝ 1 440 եվրո,
- 2024թ.՝ 2 010 եվրո,
- 2025թ.՝ 2 820 եվրո:

Ելնելով գործի քննության արդյունքներից և ղեկավարվելով Սահմանադրության 168-րդ հոդվածի 3-րդ կետով, 170-րդ հոդվածի 1-ին և 4-րդ մասերով, ինչպես նաև «Սահմանադրական դատարանի մասին» սահմանադրական օրենքի 63, 64 և 74-րդ հոդվածներով՝ Սահմանադրական դատարանը **Ո Ր Ո Շ Ե Ց** .

1. «Կշիռների և չափերի միջազգային բյուրոյին (ԿՉՄԲ/BIPM)» ասոցացված անդամ դառնալու մասին» և «Օրենսդրական չափագիտության միջազգային կազմակերպությանը (ՕՉՄԿ/OIML)» թղթակցային անդամ դառնալու մասին» նամակ-համաձայնագրերում ամրագրված պարտավորությունները համապատասխանում են Սահմանադրությանը:

2. Սահմանադրության 170-րդ հոդվածի 2-րդ մասի համաձայն՝ սույն որոշումը վերջնական է և ուժի մեջ է մտնում հրապարակման պահից:

ՆԱԽԱԳԱՀՈՂ



Ա. ԴԻԼԱՆՅԱՆ

23 դեկտեմբերի 2025 թվականի
ՍԴՈ-1808